

## **Pol ndê bapia têtj lau Kolosi-nga Yom whê bapia dindec sa-nga**

Malac Kolosi yêc gameŋ Esia-nga, magoc Pol dau iŋ gêm mêtê yêc malac Kolosi dom. Têtj ndoc iŋ gêm mêtê mbo malac Epesas, naŋ ngac Kolosi-nga daŋ ɲaê Epapras ngô ma kêŋ whiŋ, ma tiŋambu Epapras mbu gi hoc ɲawaê ɲayham asê yêc ndê malachu Kolosi (1:7; 4:12), ma lau ɲatô sic hu sêkêŋ whiŋ Yisu. Tiŋambu Epapras ndöc gapocwalô whiŋ Pol (Pilemon 23), ma gic miŋ têtj Pol pi lau sêkêŋ whiŋ-nga yêc malac Kolosi.

Pol to bapia dindec ma sôm têtj lau Kolosi-nga bu iŋ gêm daŋge Anötö tu ɲac si sêkêŋ whiŋ-nga, ma iŋ tôc lêŋ ɲayham daêsam têtj lau sêkêŋ whiŋ-nga tu sêŋkuc-nga. Ma iŋ to yom ɲatô bu whê lau Kolosi si gauc sa pi yom ɲandô. Ɔahu bu lau ɲatô sêŋsôŋ ɲac pi lau nom-nga si lêŋ ɲatô (2:4, 8, 16-23), ma ɲac sêtoc Kilisi sa ɲapep dom, ma bocdinaŋ iŋ tôc asê bu Anötö kêŋ gêŋ hoŋ sêsôc Kilisi ɲapu (1:15-20; 2:9-15).

### *Pol gic hu ndê bapia*

<sup>1</sup> Aô Pol, naŋ gati Yisu Kilisi ndê aposel kêkuc Anötö ndê atac whiŋ, lu yac neŋ asidôwa Timoti ato bapia dindec. <sup>2</sup> Ato têtj mac asidôwai

naŋ andöc malac atu Kolosi, mac lau dabuŋ naŋ akêŋ whiŋ Kilisi. Mwasinŋ ti yom malô akêŋ Damaŋ Anötö têtŋ mac.

*Pol teŋ mbec tu lau Kolosi-ŋga*

<sup>3</sup> Tôm bêc hoŋ yac atenŋ mbec têtŋ Anötö, yac neŋ Pômdau Yisu Kilisi Damba, ma am dange inŋ tu mac-ŋga. <sup>4</sup> Ŋahu bu yac aŋgô ŋawaê bu mac akêŋ whiŋ Yisu Kilisi ŋaŋga, ma atac whiŋ Anötö ndê lau dabuŋ hoŋ. <sup>5</sup> Mac nem akêŋ whiŋ ti atac whiŋ ŋahu sip mwasinŋ atu naŋ mac akêŋ batam ambo, naŋ Anötö po sa gwananŋ tu mac-ŋga yêc undambê. Yom pi gêŋ dau mac aŋgô muŋ su, têtŋ ndoc sêhoc yom ŋandô ŋawaê ŋayham-ŋga asê têtŋ mac. <sup>6</sup> Ŋawaê ŋayham dau têtŋ mac meŋ, ma mac aŋgô ti aŋyalê yom ŋandô pi Anötö ndê mwasinŋ atu. Têtŋ ndoc mac aŋgô tiwakuc e meŋ têtŋ kwahic dec, naŋ ŋawaê ŋayham dau gêm ŋandô ma tiapa yêc mac nem gameŋ. Ma ŋalêŋ tigeŋ inŋ gêm ŋandô ma tiapa ma gêm gameŋ naŋ lau Rom-ŋga sem gôliŋ, naŋ ahuc. <sup>7</sup> Ŋawaê dau Epapras kêdôhônŋ têtŋ mac. Inŋ yac neŋ ŋgac atac whiŋ-ŋga naŋ gêm gweleŋ whiŋ yac, ma ŋgac akiŋ ŋandô naŋ gêm akiŋ Kilisi tu mac-ŋga. <sup>8</sup> Ma inŋ gic miŋ têtŋ yac pi mac nem lêŋ atac whiŋ asidôwai-ŋga naŋ Ŋalau Dabuŋ kênŋ têtŋ mac.

<sup>9</sup> Tu dinaŋ-ŋga têtŋ bêc ŋamata-ŋga naŋ yac aŋgô mac nem ŋawaê e meŋ têtŋ kwahic dec, naŋ yac atenŋ mbec tu mac-ŋga ŋapaŋ. Yac andac Anötö bu kênŋ gauc têtŋ mac e aŋyalê Ŋalau Dabuŋ ndê lêŋ tidônŋ. Ma ŋalêŋ dinaŋ

mac oc aňyalê lêñ nañ Anötö tac whiñ bu yac dasa-ňga, nañ ñapep eñ. <sup>10</sup> Yac ateq mbec bu mac asa nem lêñ gitêñ, bu tôc asê bu mac ati Pômdau ndê lau, ma iñ oc lic mac nem lêñ hoñ ndic iñ tandô ñayham. Yac ateq mbec bu mac nem akêñ whiñ oc nem ñandô ñayham yêc gweleñ hoñ nañ mac akôm, ma bu mac nem gauc aňyalê Anötö-ňga êñsôwec tiatu. <sup>11</sup> Anötö ndê ñaclai ti ñawasi atu kên ñaňga têt mac bu akôm gêt hoñ, ma ñawapac bu tap mac sa, dec mac atôm bu alhac ñaňga ma ahôc ti atac pa su. Ma ambo ti atac ñayham, <sup>12</sup> ma anem dañge Damañ Anötö, nañ gic dabiñ mac e atôm bu awêkaiñ iñ ndê gameñ ñawê-ňga awhiñ iñ ndê lau dabuñ hoñ. <sup>13</sup> Iñ kêgaho yac su yêc ñaclai ñasec-ňga, ma kên yac dambo iñ ndê Atu nañ iñ atac whiñ ñandô, nañ ndê gôliñ ñapu. <sup>14</sup> Ma Anötö kêmwasin yac, dec gêmlihi yac ti kêgapwêc yac su yêc sakiñ mêtê sac-ňga, ma suc yac neñ sac kwi. Ma datap mwasin atu dau sa yêc iñ ndê Atu dau.

### *Kilisi ti ndê gweleñ*

<sup>15</sup> Lau dañ sêlic Anötö dom, magoc iñ Atu Kilisi gêm iñ aňgô ma tôc iñ asê têt yac. Iñ tiñamata gêt hoñ nañ Anötö kên. <sup>16</sup> Bu gêt undambê-ňga ti gêt nom-ňga hoñ nañ Anötö kên, nañ kên ña Kilisi. Gêt nañ dalic ña tanôn, ma gêt nañ tôm dom bu dalic ña tanôn, gitôm aňela me ñalau me gôliñ ma ñaclai tidau-tidau, gêt hoñ dinañ Anötö kên ña Kilisi ma kên tu Kilisi-ňga. <sup>17</sup> Iñ tiñamata gêt hoñ, ma gêt hoñ si ñahu sêmbo-ňga yêc iñ. <sup>18</sup> Ma iñ gêm gôliñ

gôlôwac dabuñ. In ti ñagôlôn, ma gôlôwac dabuñ sêti in ndê ñandô. Ma in muñ gôlôwac dabuñ bu ti ñgac ñamata-ña bu tisa akêñ lau batê-ña. Ma bocdinañ gêñ dañ hóc gêlêc in su dom. <sup>19</sup> Bu Anötö gêlic ñayham bu kênñ dau sambuc sip Atuñgac ñalôm ma mbo whiñ in. <sup>20</sup> Ma in kênñ Atu dau sip nom meñ bu hê wamba ñamalac ma gêñ nom-ña ti gêñ undambê-ña hoñ têñ Anötö. Ma kwahic dec ñamalac sêtôm bu sêmbô Anötö añgô-ña ti yom malô, tu Atuñgac ndê dac nañ kêc siñ pi a gicso-ña.

<sup>21</sup> Muñ-ña, mac ambo ahê têñ Anötö. Mac ambo atôm in ndê ñacyo tu gauc ti mêtê sac-sac nañ yêc mac-ña. <sup>22</sup> Magoc in dau kêmasañ lêñ bu Kilisi sip nom meñ ti ñamalac ma mbac ndu, tu bu hê wamba mac têñ Anötö tiyham. Ma in tac whiñ bu kênñ mac alhac in añgô-ña atôm lau dabuñ nañ nem giso ti yom mbasi. <sup>23</sup> Mac bu alhac ti akêñ whiñ ñaña ma akêñ batam Anötö ndê mwasiñ nañ ñawaê ñayham tôc asê têñ mac, ma ahu siñ dom, dec mac oc atap mwasiñ dau sa. Ñawaê ñayham dau mac añgô su, ma sêhoc asê yêc gameñ hoñ nañ yêc lau Rom si gôliñ ñapu, nañ bocdinañ. Ma aö Pol gati ñgac akiñ ñawaê ñayham dau-ña.

*Pol whê ndê gwelen ñawaê ñayham-ña sa*

<sup>24</sup> Ñandê bocke nañ aö gahôc tu wapuc mac nem akêñ whiñ dôñ-ña, nañ gahôc ti atac ñayham eñ. Ma aö kayalê bu aö gac waê bu wahôc ñandê ñapañ, tu gwelen nañ aö gakôm

tu bu wapo Kilisi ndê ñandô, nañ gôlôwac dabuñ sa-nga. M agoc aõ oc wahôc e wandic dabiñ gêñ hoñ nañ Kilisi kêyaliñ sa bu wahôc. <sup>25</sup> Aõ gakôm gwelenñ gam akiñ gôlôwac dabuñ, kakuc lêñ nañ Anötö dau kêmasañ dec kêyaliñ aõ sa tu mac-nga, ma kêkiñ aõ bu wahoc ñawaê ñayham asê e Anötö ndê yom tiapa yêc gameñ hoñ. <sup>26</sup> Têñ ñamata-nga e meñ, yom pi Anötö ndê lêñ nem lau si-nga, nañ ñahu yêc siñ dau têñ lau nom-nga. Magoc kwahic dec iñ tôc asê tiawê têñ iñ ndê lau dabuñ. <sup>27</sup> Iñ tac whiñ bu lau dabuñ sêñyalê yom nañ muñ-nga yêc siñ dau, nañ bocdec bu. Iñ bu êmwasiñ mac †lau gameñ apa-nga bu atap iñ ndê ñawasi atu sa, dec kêñ Kilisi sip nem ñalôm. Ma gêñ dinañ ti mac nem ñahu akêñ batam bu atap iñ ndê ñawasi sa-nga.

<sup>28</sup> Yac ahoc Kilisi ndê ñawaê ñayham asê, ma Anötö kêñ gauc ñayham têñ yac bu akêñ puc ti andôhônñ lau sêkêñ whiñ-nga hoñ. Ma yac akôm bocdinañ tu bu andic dabiñ ñac hoñ e akêñ ñac sêlhac Anötö añgô-nga sêtôm lau gwalam akwa sêkêñ whiñ Kilisi-nga. <sup>29</sup> Ma aõ gakôm gwelenñ ti gahôc ñandê atu, tu bu wakôm gêñ dau ñandô sa-nga, ña Kilisi dau ndê ñaclai nañ gêm gwelenñ ñaŋga yêc aõ neñ ñalôm.

## 2

<sup>1</sup> Aõ gawhê neñ gwelenñ sa têñ mac, ñahu bu aõ atac whiñ bu mac añyalê bu aõ gayêm

dauḡ su ḡandô tu mac-ḡga, ma tu lau Laodisia-ḡga, ma tu lau sêkêḡ whiḡ-ḡga hoḡ naḡ sêlic aô aḡôḡ dom-ḡga, naḡ bocdinaḡ. <sup>2</sup> Aô tac whiḡ bu mêtê atac whiḡ-ḡga piḡ mac hoḡ dôḡ, ma puc mac dôḡ bu alhac ḡḡga. Ma yom pi Anötö ndê lêḡ nem lau si-ḡga naḡ muḡ-ḡga yêc siḡ dau, naḡ aô tac whiḡ bu mac aḡyalê tidôḡ andô, e kôm mac alhac ti akêḡ whiḡ ḡḡga eḡ. Yom dau hêganôḡ Kilisi. <sup>3</sup> Bu yom ti gauc naḡ atu andô ma tôḡ bu êmwasiḡ yac-ḡga, naḡ Anötö gêm ahuc yêc iḡ-ḡga.

<sup>4</sup> Aô gawhê yom hoḡ dinaḡ sa têḡ mac, ḡahu bu aô gatec bu lau ḡatô sêmbac yom mac ma sêḡsau mac. <sup>5</sup> Bu aô dauḡ gambo gawhiḡ mac dom, tigeḡ yêc aneḡ ḡalôm aô gauc gêm mac ḡapaḡ. Ma aô atac ḡayham atu, bu kayalê bu mac akêḡ whiḡ Kilisi ḡḡga, ma asa nem lêḡ hoḡ ḡapep.

### *Dasa neḡ lêḡ tiwakuc tu Kilisi-ḡga*

<sup>6</sup> Mac akôc Yisu Kilisi sa su ti mac nem Pômdau, dec akêḡ iḡ tiḡamata nem lêḡ hoḡ. <sup>7</sup> Akôc ḡḡga yêc iḡ tôḡ a naḡ ḡawakac gacgeḡ sip nom ḡalôm gi. Ma iḡ ndê ḡaclai po mac nem akêḡ whiḡ sa bu alhac ḡḡga, alhac yom ḡandô naḡ sêndôhôn têḡ mac, naḡ ḡahô. Ma yom anem danḡe Anötö-ḡga nem mac ahuc tôḡ bêc hoḡ. <sup>8</sup> Ayob daôm ḡapep bu lau tasaḡ si yom ḡambwa-ḡambwa êḡsôḡ mac nem gauc ma êḡgaho mac su yêc yom ḡandô e ati lau gapocwalô-ḡga lec dom. ḡac si yom dau ḡahu kêkuc abuḡgaci si lêḡ ti mêtê nom-ḡga ḡambwa, ma meḡ akêḡ Kilisi ndê dom.

<sup>9</sup> Bu Anötö kêṅ dau sambuc sip Kilisi ṅalôm, ma meṅ mbo nom gitôm ṅamalac. <sup>10</sup> Kilisi dau iṅ gôliṅ ti ṅaclai hoṅ ṅadau. Ma tu mac nem akêṅ whiṅ piṅ mac dôṅ am damiṅ iṅ-ṅga, dec Anötö ndê mwasiṅ gêm mac ahuc. <sup>11</sup> Kilisi kôm lau Israel-ṅga si ṫpwac sêsê ṅamlic ṅatô su-ṅga ṅandô sa pi mac lau naṅ ati iṅ ndê. Gêṅ dau hôc asê kêkuc ṅamalac si lêṅ sêsê ṅamlic-ṅga dom, magoc Kilisi dau kôm gweleṅ yêc mac nem ṅalôm gitôm iṅ sê mac nem mêtê sac ṅalôm akwa-ṅga su giṅga. <sup>12</sup> Busaṅgu naṅ mac aliṅ, naṅ piṅ mac dôṅ am damiṅ Kilisi, tôm sêṅsuhuṅ mac awhiṅ iṅ, ma Anötö uṅ mac sa awhiṅ iṅ. Gêṅ dau ṅandô sa tu mac akêṅ whiṅ Anötö, naṅ uṅ Kilisi dau sa akêṅ lau batê-ṅga, naṅ ndê ṅaclai.

<sup>13</sup> Muṅ-ṅga, mac ambo atôm lau batê tu mac nem sac-ṅga, ma tu mac asap mêtê ṅalôm akwa-ṅga dôṅ ṅapaṅ-ṅga. Tigeṅ Anötö suc mac nem sac hoṅ kwi, ma kôm mac ati lau ambo tamli tiyham-ṅga awhiṅ Kilisi. <sup>14</sup> Tu yac taṅgì Anötö ndê yomsu-ṅga, dec yac datôm lau naṅ si bapia tốp-ṅga yêc, ma datôm dom bu dandic tốp dau, dec tac waê bu datap matôc sa. Magoc Anötö kôc bapia tốp-ṅga dau su yêc yac, ma gic pi a gicso dau whiṅ Kilisi. <sup>15</sup> Ma Kilisi ndê mbac ndu pi a gicso dau ti lêṅ bu Anötö ku Sadaṅ ti ndê ṅalau ma ṅaclai sac hoṅ dulu, gitôm ṅgac bata siṅ-ṅga naṅ kôc ṅacyo si wapa siṅ-ṅga hoṅ su, ma wê ṅac gitôm lau gapocwalô-ṅga bu tôc asê tiawê bu ṅac si ṅaclai pacndê sambuc.

*Yom pi ñagôliñ nom-ñga*

<sup>16</sup> Tu dinañ-ñga dec lau ñatô bu sêngôliñ yom pi mac tu gêñ nañ añ ti anôm-ñga, me tu om nañ lau sêlic tòm wake me ayô me yala-ñg a, me tu bêc Sabat-ñga, nañ aᅅgô ñac si yom dom. <sup>17</sup> Bu gêñ hoñ dinañ gitôm gêñ ñagatu ñambwa nañ dalic muñ su, ma tiñambu ñandô meñ hóc asê. Ma ñandô dau, nañ Kilisi. <sup>18</sup> Lau ñatô sêñkuc lêñ ñalôm akwa-ñga ma sêtoc dau sa tu ñac si lêñ sem akiñ Kilisi-ñga. Ñac sêsôm bu sêpu dau ñandô, ma sem akiñ añela kêkuc gêñ ñatô nañ sêyêc mbê ma sêlic. Lau kaiñ dinañ b u sêpu mac ma sêsôm bu mac nem a kêñ whiñ iñ gêñ ñandô mbasi-ñga, dec akóc ñac si yom sa dom. <sup>19</sup> Bu lau kaiñ dinañ sêsap Kilisi, nañ ti gôlôwac dabuñ hoñ si ñagôlôn, nañ dôñ dom. Iñ tawasê piñ yac hoñ dôñ dapitigeñ, ma gôlôwac d abuñ kêsôwec ña ñaclai nañ Anötö dau kêñ.

<sup>20</sup> Aᅅgô su nañ. Têñ ndoc ñamalac d añ mbac ndu, nañ ñagôliñ ti ñaclai nom-ñga gêm gôliñ iñ tiyham dom. Ma tu Anötö piñ mac dôñ am damiñ Kilisi-ñga, dec tòm mac ambac ndu awhiñ iñ. Bocdinañ tu sake-ñga mac ambo atôm lau nañ sêhêgo dau pi ñagôliñ nom-ñga? <sup>21</sup> Lau kaiñ dinañ sic yao gêñ tidau-tidau ma sêsôm bocdec bu, “Akóc dom, aneñ ti anôm dom, ma amasec dom.” <sup>22</sup> Yom kaiñ dinañ kêkuc gauc ti ñagôliñ nañ lau nom-ñga sêndôhôn, ma hêganôn gêñ têm kwahic dec-ñga nañ tañ ti danôm ma gêñ dau meñ giñga. <sup>23</sup> Lau nañ sêsôc ñagôliñ kaiñ dinañ ñapu, nañ



sêṅkuc gauc ṅamalac-ṅga tu lêṅ sênem akin Anötö-ṅga ti sêṅgwiniṅ dau-ṅga ma lêṅ sêkêṅ wapac pi dau ṅamlic-ṅga. Sêtoc lêṅ dau sa gitôm lêṅ ti gauc atu, ma gauc gêm bu oc ndic Pômdau tandô ṅayham. Magoc mba. Lêṅ dau hêganôṅ gêṅ awê-ṅga ṅambwa, ma oc tôm dom bu nem ṅac si ṅalôm kwi e sêhu lêṅ ṅalôm ṅagalac-ṅga siṅ.

### 3

#### *Kilisi ti yac neṅ dambo taṅli ṅahu*

<sup>1</sup> Anötö uṅ mac sa awhiṅ Kilisi, ma kwahic dec iṅ ndöc Anötö ndê andô-ṅga yêc undambê. Tu dinaṅ-ṅga dec asa nem lêṅ ti tamkwê gêṅ undambê-ṅga eṅ. <sup>2</sup> Gauc nem gêṅ nom-ṅga êṅlêc dom. Gauc nem gêṅ undambê-ṅga hôc gêlêc. <sup>3</sup> Bu mac ambac ndu su awhiṅ Kilisi, ma mac nem ṅahu ṅ andô ambo tamli awhiṅ Kilisi-ṅga, naṅ yêc siṅ dau yêc Anötö-ṅga. <sup>4</sup> Têṅ ndoc mac nem tamli ṅahu Kilisi dau meṅ hôc asê, naṅ Anötö oc tîc mac nem lêṅ ambo tamli-ṅga asê tiawê, ma mac oc alhac awhiṅ Kilisi ti ṅawasi atu.

#### *Lêṅ ṅalôm akwa-ṅga*

<sup>5</sup> Bocdinaṅ ahu mêtê sac hoṅ naṅ meṅ akêṅ ṅalôm akwa, naṅ siṅ. Mêtê dau gitôm mac nem ṅacyo daṅ naṅ kalhac seṅ andöc tamli-ṅga ahuc, bocdinaṅ andic iṅ ndu. Mêtê kaiṅ bocdec ahu hoṅ siṅ, mêtê mockaiṅ-ṅga, mêtê ṅadômbwi, ma mêtê sac-sac ṅalôm ṅagalac-ṅga. Ma ayob daôm bu aṅkuc lau naṅ sêkêṅ

awa ti wapa nom-nga kalhac si gauc ñamata ñapañ, nañ dom. Bu lêñ dau gitôm ñac sem akiñ anötö gwam. <sup>6</sup> Lau hoñ nañ sêsa lêñ kaiñ dinañ, oc sêtap Anötö ndê atac ñandê sa. <sup>7</sup> Muñ-nga, mac daôm akôc gauc tôm ñac lau dinañ sêkôc, ma añkuc ñac si mêtê sac. <sup>8</sup> Magoc kwahic dec ahu mêtê sac hoñ siñ. Atac ñandê têñ lau me alic ñac sac dom, ñalôm li sa dom, ma ayob nem whamsuñ bu asôm yom sac-sac apu lau-nga ti yom mayañ-nga dom. <sup>9</sup> Ma asôm yom tasañ têñ nem asidôwai dom. Gauc nem bu mac ahu lêñ ñalôm akwa-nga siñ su, dec akôm mêtê kaiñ dinañ tiyham dom. <sup>10</sup> Ma asa nem lêñ ti ñalôm wakuc. Bu Anötö, nañ kêmasañ ñamalac bu sênem iñ aṅgô sêmbo nom, nañ gêm gwelêñ pi mac mbo, tu bu mac atiwakuc, ma tu bu mac aṅyalê iñ ti ndê lêñ gitêñ tidôñ. <sup>11</sup> Ma yac lau nañ dasa lêñ wakuc dinañ, nañ dahêgo dauñ tu yac neñ ñahu nom-nga tiyham dom. Yac bu lau Grik me lau Israel-nga, gai me lau aṅgô batac, lau nañ tañkuc pwac sêsê ñamlic-nga me tañkuc dom, lau akiñ ñambwa me lau nañ dau sêmbo si gêñ, nañ Anötö gauc gêm lêñ hoñ dinañ ñadañ hôc gêlêc su dom. Gêñ tigeñ nañ gêñ atu têñ iñ, nañ Kilisi piñ yac hoñ dônñ dati iñ ndê.

### *Lêñ ñalôm wakuc-nga*

<sup>12</sup> Anötö tac whiñ mac ma kêyalîñ mac sa ati iñ ndê lau dabuñ. Tu dinañ-nga dec asap mêtê ñayham bocdec dônñ gitôm mac asôc ti nem ñakwê. Tamwalô lau ma atac apu ñac ti nem ñalôm sambuc, aṅgwiniñ daôm, asa

lêñ malô, ma akôc nem ñalôm dôñ. <sup>13</sup> Asa nañ ndê asidôwa kôm sac têtñ iñ, nañ kôc ndê ñalôm dôñ bu hôc ñawapac dau, ma suc iñ ndê sac kwi. Asuc sac nañ asidôwai sêkôm têtñ mac nañ kwi, tôm Pômdau dau suc mac nem kwi. <sup>14</sup> Ma asap mêtê atac whiñ-ñga dôñ, bu mêtê dau piñ mêtê ñayham-ñayham hoñ dôñ sêpitigeñ. <sup>15</sup> Kilisi ndê yom malô nem gôliñ mac nem ñalôm. Bu Anötö kêgalêm mac sa bu ati gôlôwac dabuñ tigeñ, nañ yom malô dau piñ mac dôñ. Ma anem dañge Anötö ñapañ. <sup>16</sup> Kilisi ndê yom ñandô nem mac nem ñalôm ahuc sambuc, dec kêñ gauc ñayham têtñ mac bu anem la ti andôhôn têtñ daôm. Anem wê yêc Buku Wê-ñga, ti wê dabuñ ma wê ñatô nañ Ñalau Dabuñ kêñ têtñ mac, bu ampiñ Anötö ma anem dañge iñ ti nem ñalôm sambuc. <sup>17</sup> Gêñ hoñ nañ mac akôm ti yom hoñ nañ asôm, nañ akôm tu Pômdau Yisu ndê ñaê-ñga. Ma anem dañge Damañ Anötö tu Kilisi-ñga.

*Damba ti dindai ma balêkoc si ñagôliñ ñatô*

<sup>18</sup> Mac lauwhê, asôc nem ñgaci ñapu, bu lêñ dinañ gic waê lauwhê nañ sêkêñ whiñ Kilisi. <sup>19</sup> Ma mac laungac, atac whiñ nem lauwhê ma atigasec ñac dom. <sup>20</sup> Balêkoc, mac dañam wambu yom hoñ nañ dinam ti damami sêsôm têtñ mac. Bu lêñ dinañ gic Pômdau tandô ñayham. <sup>21</sup> Mac dambai, ali nem balêkoc si ñalôm sa dom. Ayob ñac ñapep tu bu ñac lic ñakam sa e sêtec lêñ ñayham lec dom.

*Lau akiñ ma ñadaui si ñagôliñ*

22 Mac lau akiñ, asôc nem ñadaui nom-nga si yom hoñ ñapu. Anem akiñ tu bu mac nem ñadaui sêlic mac ñayham-nga ñambwa lec dom. Mba. Mac nem ñadaui bu sêmbo sêwhiñ mac me sêmbo dom, magoc akôm nem gwelen hoñ ñapep eñ. Anem akiñ ti nem ñalôm sambuc, ma atôc asê bu mac atoc Pômdau sa. 23 Akôm gêñ hoñ ti nem ñalôm sambuc eñ, gitôm mac am akiñ Pômdau, ma tôm mac am akiñ lau nom-nga tawasê dom. 24 Mac añyalê su bu mac am akiñ Kilisi mac nem Pômdau, ma iñ oc kêñ mac awêkaiñ nem gêñ lêñsêm yêc undambê ti mac nem ñagêyô ñayham. 25 Magoc asa nañ kôm giso, nañ oc tap ndê ñagêyô sa. Ma Anötö oc toc ñamalac dañ sa hôc gêlêc dañ dom. Iñ oc êñsahê yac hoñ ña saê tigeñ.

## 4

1 Mac ñadaui, añyalê ñapep bu mac daôm nem Ñadau mbo undambê, ma bocdinañ ayob nem lau akiñ ñapep, ma ñaôli bocke nañ gic ñac ñawaê, nañ akêñ têñ ñac.

### *Pol gêm la lau Kolosi-nga*

2 Anem ali ma asap mêtê dateñ mbec-nga ti danem danje Anötö-nga dôn ñaŋga. 3 Ma ateq mbec tu yac-nga whiñ, bu Anötö lêc gatam su têñ yac bu ahoc iñ ndê yom asê, ma bu awê yom pi Kilisi nañ muñ-nga yêc siñ dau, nañ sa tiawê. Tu Kilisi ndê yom dinañ-nga dec aö gandöc gapocwalô. 4 Ateñ mbec bu Anötö puc aö dôn bu wakôm neñ gwelen ñapep, ma

wawhê yom dau sa yêc awê eḡ. <sup>5</sup> Asa nem lèn ambo lau sêkên whiḡ dom-ḡga ḡalôm ti gauc eḡ. Ma aḡsalê lèn tu bu atôc Kilisi tèn ḡac tôm bêc hoḡ. <sup>6</sup> Akôc gauc ḡapep pi yom asôm-ḡga bu asôm yom êmwasiḡ lau ti nem ḡac sa-ḡga, ma aô lau si yom ḡalên ḡayham.

*Pol sôm bu êḡkiḡ Tikikus lu Onesimus sêtên Kolosi sêndi*

<sup>7-8</sup> Kwahic dec aô bu waḡkiḡ yac neḡ asidôwa ma ḡgac atac whiḡ-ḡga Tikikus tèn mac loc. Iḡ kalhac ḡaḡga ma ḡêm akiḡ Pômdau whiḡ aô. Aô waḡkiḡ iḡ loc bu ndic miḡ aneḡ yom, ma asidôwai gameḡ dindec-ḡga si yom hoḡ tèn mac. Ma iḡ oc nem malô mac nem ḡalôm. <sup>9</sup> Ma aô waḡkiḡ Onesimus, naḡ mac nem daḡ ma yac mba asidôwa atac whiḡ-ḡga naḡ kên whiḡ ḡaḡga eḡ, whiḡ Tikikus tèn mac loc. Iḡlu oc sêndic miḡ yom gameḡ dindec-ḡga hoḡ tèn mac.

*Pol kên ndê acsalô tèn lau ḡatô*

<sup>10</sup> A ristakus, naḡ ndôc gapocwalô whiḡ aô, naḡ kên ndê acsalô tèn mac, ma Banabas ndê tènḡac Mak kôm acsalô tèn mac bocdinaḡ. Mak bu hóc asê mac, dec akôm tôm aô gasôm tèn mac muḡ su, ma akôc iḡ sa. <sup>11</sup> Ma Jisas, ḡgac naḡ sêsam iḡ ndê ḡaê daḡ bu Justus, naḡ kên ndê acsalô tèn mac whiḡ. ḡac lau tô dinaḡ sêmbo sêwhiḡ aô ma sem malô aneḡ ḡalôm. ḡac lau Israel-ḡga naḡ sêkên whiḡ Kilisi, ma sem gwelenḡ sêwhiḡ aô ma yac ahoc

ɲawaê pi Anötö ndê gôliɲ asê. Lau Israel-ɲga daêsam sêmbo sêwhiɲ aô dom, ɲac lau tö dinaɲ solop. <sup>12</sup> Ma Epapras, Kilisi ndê ɲgac akiɲ, naɲ mac daôm nem daɲ, naɲ kêɲ ndê acsalô têtɲ mac bocdinaɲ. Iɲ tòm bêc hoɲ teɲ mbec tu mac-ɲga bu mac alhac ɲaɲga atôm lau gwalam akwa akêɲ whiɲ-ɲga, ma asa nem lêɲ hoɲ tòm Anötö tac whiɲ. <sup>13</sup> Aô wasôm yom ɲandô têtɲ mac bu iɲ yêm dau su ɲandô tu mac-ɲga ɲapaɲ, ma tu lau sêkêɲ whiɲ-ɲga naɲ sêmbo malac Laodisia ma malac Hierapolis-ɲga bocdinaɲ.

<sup>14</sup> Luk, dokta naɲ yac atac whiɲ, lu Demas sêkêɲ si acsalô têtɲ mac whiɲ. <sup>15</sup> Akêɲ yac mba acsalô têtɲ asidôwai Laodisia-ɲga, ma têtɲ lau sêkêɲ whiɲ-ɲga naɲ sêkac sa yêc Nimpa ndê andu tu sêlic om-ɲga, ma têtɲ Nimpa dau bocdinaɲ.

<sup>16</sup> Têtɲ ndoc sêsam bapia dindec têtɲ mac su, naɲ akêɲ têtɲ gôlôwac dabuɲ yêc Laodisia bu ɲac sêsam whiɲ. Ma bapia naɲ aô gakêɲ têtɲ ɲac, naɲ sêkêɲ têtɲ mac asam bocdinaɲ. <sup>17</sup> Asôm têtɲ Akipus bu sap sakiɲ naɲ Pômdau kêɲ sip iɲ amba, naɲ dôɲ, ma kôm ɲapaɲ e ndic dabiɲ.

<sup>18</sup> Aneɲ ɲaê Pol dec, gato ɲa aô dauɲ amaɲ. Aô gacgeɲ gandôc gapocwalô, dec wandac mac bu gauc nem aô. Anötö ndê mwasiɲ whiɲ mac hoɲ.

**Anötö ndê Yom Lêñsêm Wakuc**  
**Bugawac: Anötö ndê Yom Lêñsêm Wakuc New**  
**Testament**

copyright © 2013 Lutheran Bible Translators Australia

Language: Bugawac

Contributor: Wycliffe Bible Translators, Inc.

All rights reserved.

2020-11-11

---

PDF generated using Haiola and XeLaTeX on 21 Sep 2022 from source  
files dated 17 May 2022

1dcc5a6c-3c1e-54e8-aa77-af18a3782048